

**Saturday, January 17, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**RS MP**

Rajya Sabha MP Pu K.Vanlalvena'n tunkar Ningani leh Zirtawpni khan Thingsai leh Sangau inkar Kawngpui sial laih mek leh Tuipui D lei thar siam tur a enfiah.

India leh Myanmar inrina kawng laih mek Hnahthial District-a Bualpui H leh Lawngtlai District a Pangkhaw inkara hna thawktu BRO ten Compensation harsatna chhuanlam avanga kum 2021 atanga 2023 inkara hnathawh an chawlhsan chu sawrkar laipua hotute hnenah hnathawh chhunzawm thuai tura a lo ngen thin tawh avanga hna chhunzawm leh tak thu MP Pu K. Vanlalvena chuan a sawi a. Pangkhua atanga Saisihchhuah Myanmar border road laihna tur atana DONER Ministry in kum 2021 a cheng vaibelchhe 66 a lo sanction tawh BRO ten hna an thawh loh avanga DONER Ministry in pawisa sanction tawh sa a hnuh kir vek hnuah sorkar laipua Ministry of Defence in Hnahthial District Bualpui H lam atanga kawngpui sial hna kum 2024 tawp lam atanga an lo chhunzawm leh thei ta chu lawmawm a tih thu Pu K. Vanlalvena chuan a sawi a ni.

Rajya Sabha MP chuan Bualpui H atanga Tiau leh Chhimtuipui infinna bul thlenga Border road laih mek chu tlawh in, Pangkhaw ram leh Bualpui H ram dawh zawm tu tur Chhimtuipui lui chung a Lei siam tur ban phunna lai tur chu BRO EE te nen an en ho nghal baw k a ni.



**PHE**

Public Health Engineering (PHE) department hotute chuan thal thleng mekah mipuite tui in tur pek kawngah harsatna liantham an la tawh rih loh thu an sawi.

Akashvani News zawhna chhangin PHE department hotute chuan tun dinhmunah Aizawl khawpui chawmtu khawl Phase I, II leh III ten tluang taka tui an pump reng thu leh heng khawlah te hian chhia emaw, tluang lo emaw a awm rih loh thu an sawi a. Tui pump tur pawh a tam thawkhat rih thu sawiin tui pawh a thianghlim that thu leh tui nu avanga harsatna tawh thin pawh tunah chuan a awm lem loh thu an sawi a. Tui semtuten an duh zat an sawi ang chu an pek zel theih rih thu an sawi a, hetihual hian an tui pekchhuahna kalkawng, pipe network la rualkhai taw k lo avangin veng thenkhat han harsa leh zeuh thin erawh a awm theih thu an sawi a ni.

PHE department hotute chuan thla thar February thla chho thleng hi chuan harsatna an taw k rih lo tura an ngaih thu sawiin kumdangah chuan March thla chho atangin tui a tlem thin thu an sawi a. Hetah hian tui lakna hnar bulah thal tui harsatna sukiang turin tui an khuah thin thu sawiin tunah hian tuia harsatna a awm loh nan reilote atana khuap loin a ngheta Phase II tui khuahna atanga km 3-ah meter 8 vela

sang tui khuahna tur ruahmanna an neih mek thu leh hei erawh hi chu hna liantham deuh anih avangin hun la duh hret tur a nih thu an sawi a ni.



## **PRISONERS**

Mizoram chhunga tanin hrang hrangah tun dinhmunah tang mi 1669 an awm.

Prisons Department in vawiina an tihchhuah Mizoram Prisoners Daily Population Report-a tarlan a nih danin Mizoram lungina tang thei zawng zawng zat chu mi 1496 niin a awm thei zat bakah mi 482 an awm belh mek a. Hei hi Central Jail, Women's Jail, Aizawl District Jail, Lunglei District Jail leh Champhai District Jail te a a awm thei zat aia tam an awm vang a ni a. Hetihruah hian Siaha District Jail, Kolasib District Jail, Lawngtlai District Jail, Serchhip District Jail, Mamit District Jail leh Saitual District Jail-ah te chuan a belhkhawmin mi 309 tan theihna hmunruak a awm thung a ni.

Prisons department tarlan danin tun dinhmunah District Jail, Saitualah tang an awm lo a. An nu leh pa te bula awm lo thei lo naupang 14 te lungin hrang hrangah hian an awm mek bawk a. Heng naupang te hi lungina awm mek zat belhkhawmah hian chhiar tel an ni.



## **MCS COMBINED MAINS RESULTS DECLARED**

Mizoram Public Service Commission (MPSC) in Mizoram Civil Services (Combined Competitive) Examination, 2025 a kalpui meka nimina Mains result a tihchhuahah mi 66 an tling.

Nikuma MPSC in MCS Combined Competitive Examination a buatsaihah Preliminary Examination-ah Mains Exam hmachhawn turin mi 334 an tling a. Nikum October ni 22 atanga ni 30 inkar khan Mains exam hi buatsaih niin Mains Exam hmachhawn tura tling mi 334 zinga mi 320 in exam hi an hmachhawn a. Heng zingah hian mi 301 in exam hi bei tluanin exam chhawng thumna Personal Interview turin mi 66 an tling ta a ni.

Mains exam-a tling te hian tun thla ni 22 leh 23 chhungin medical exam an hmachhawn ang a. Personal Interview an neih ni tur erawh MPSC in an la tichhuak leh dawn a ni. Mizoram Civil Services (Combined Competitive) Examination, 2025 kapui mekah hian post 33 ruakin hetah hian Mizoram Civil Service post 15, Mizoram Police Service post 8, Mizoram Finance & Accounts Service post 2 leh Mizoram Information Service post 8 a ruak a ni.



## **LAWNGTLAI DC**

Lawngtlai Bawrhsap leh CADC Caretaker Pu Donny Lalruatsanga chuan nimin khan CADC tlawhin CADC thuneitute nen hmasawna tur hrang hrang an sawiho.

Lawngtlai DC chuan CADC thawktute chu pisa hun ngai pawimawh tura fuihin rinawmna nena hnathawh a pawimawh thu a sawi a, ram leh hnam hmasawna tura theihtawp chhuaha thawk turin a sawm nghal bawk.

Thutkhawmah hian CADC - department hrang hrangten harsatna an neih te thlenin hmasawn dan tur hrang hrang sawiho a ni a, A tul angin thuneitu sang zawkah thlen leh se an ti a ni.

